

Grandi y chikito ta sostene e “proyecto Ecury” di Museo Arqueologico Aruba

ORANJESTAD - Desde 10’or di mainta riba 18 di Maart un gran cantidad di bishitante a cuminsa yega Instituto di Cultura pa bishita e.o. Museo Arqueologico Aruba. Bishitantenan a keda un rato largo ta admira e artefactonan y despues nan a duna nan idea y sugerencia pa un Museo Arqueologico nobo den edificionan Ecury.

Museo Arqueologico a pone un presentacion cortico di su plannan cu ta data ya caba desde 1990 pa muda e museo pa edificionan Ecury. Bishitantenan a duna nan apoyo total na e idea aki considerando e espacio, e locacion y e hecho cu lo conserva un edificio historico dunando e un funcion valioso. Hopi ta esnan cu kier mira un reconocimiento pa e héroe nacional Boy Ecury den forma di un estatua of plakaat banda di e cas; algo cu sigur mester tene cuenta cune.

E necesidad pa mas espacio pa pone splicacion di historia Indjan di Aruba a resalta. Tur hende kier haya sa mas pero e espacio awor aki ta mucho chikito pa expone tur obheto di e coleccion y pone tur splicacion. Siguiendo sugerencia di publico lo cambia pronto tur texto den vitrina pa nos idioma Papiamentu. E texto na ingles lo ser poni den un folder.

Ta calculá cu mas di 900 persona a bishita Museo Arqueologico e dia aki. Dos blachi grandi a wordo yená cu firma y comentario pa apoya e futuro ubicacion di e museo den e edificionan Ecury. Conforme cu sugerencia di un gran cantidad di bishitante, lo entrega



e blachinan aki na Ministro di Cultura, Ramon Lee, kende desde inicio di su funcion a muestra gran interes pa e proyecto aki. Museo

Arqueologico Aruba ta gradici tur esnan cu a bishita nos e dia aki y tur cu a expresa nan palabra di apoyo y e estímulo pa e “proyecto Ecury”. Danki na

tur persona y instancia cu a yuda y un palabra di pabien na Instituto di Cultura cu sigur por mira atras riba un dia hopi existoso.